# 增广贤文

佚名

文硕阁

wenshuoge.com

## 目录

关于	找									 													3
上集								 		 		 											5
下集								 		 		 										2	7

# 版权声明

本书版权保护已经过期,属于公版书!并由"文硕阁"网站的用户制作并发布于文硕阁 网站内,请大家在"合理使用"范围内使用

这本电子书可供中华人民共和国(the People's Republic of China)和世界上大多数其他地区的任何人免费使用,几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国,您必须在使用本电子书之前查看您所在国家/地区的 法律。

### 什么是公版书?

根据我国现行「著作权法」第 20、21 条的规定,除署名权、修改权、保护作品完整权外,中国公民对其著作的法定权利均于作者死亡后第五十年的 12 月 31 日截止。超过著作权法保护日期后,其作品就进入了公有领域(公共版权)

这种因作者死亡超过50年而丧失发行权、改编权等著作权利的书籍,就称为"公共版权书籍",简称"公版书"。

### 传硕公版书保护计划

中华文明5000多年绵延不断、经久不衰,在长期演进过程中,形成了中国人看待世界、看待社会、看待人生的独特价值体系、文化内涵和精神品质,这是我们区别于其他国家和民族的根本特征,也铸就了中华民族博采众长的文化自信。

文化是一个国家、一个民族的灵魂。文化兴国运兴,文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众,我们网站所有内容都是免费、自由、无版权的。对所有的读者免费!

使用 文硕阁 中的公版书 不需要获得许可 (在中国,这属于"合理使用")。这适用于所有用途,包括商业用途。换句话说,即使是商业盈利用途,也无需支付版税。

我们希望可以有更多的用户加入到文硕阁网站中来,让我们一起来保护传承文明的 硕果。 源浚者流长,根深者叶茂。文化自信是一个国家、一个民族发展中最基本、最深沉、最持久的力量。

# 如何联系我们?

网站: www.wenshuoge.com

邮箱: <u>7sbook@duck.com</u>



(扫码访问网站)



(扫码加客服微信)

# 上集

昔时贤文, 诲汝谆谆。

集韵增广,多见多闻。

观今宜鉴古,无古不成今。

知己知彼,将心比心。

酒逢知己饮,诗向会人吟。

相识满天下,知心能几人?

相逢好似初相识,到老终无怨恨心。

近水知鱼性,近山识鸟音。

易涨易退山溪水,易反易覆小人心。

运去金成铁,时来铁似金。

读书须用意,一字值千金。

逢人且说三分话,未可全抛一片心。

有意栽花花不发,无心插柳柳成荫。

画虎画皮难画骨,知人知面不知心。

钱财如粪土,仁义值千金。

流水下滩非有意,白云出岫本无心。

当时若不登高望,谁信东流海洋深?

路遥知马力,日久见人心。

两人一般心,无钱堪买金;

一人一般心,有钱难买针。

相见易得好,久住难为人。

马行无力皆因瘦,人不风流只为贫。

饶人不是痴汉,痴汉不会饶人。

是亲不是亲,非亲却是亲。

美不美, 乡中水; 亲不亲, 故乡人。

莺花犹怕春光老,岂可教人枉度春?

相逢不饮空归去,洞口桃花也笑人。

红粉佳人休使老,风流浪子莫教贫。

在家不会迎宾客,出门方知少主人。

黄芩无假,阿魏无真。

客来主不顾,自是无良宾。

良宾方不顾,应恐是痴人。

贫居闹市无人问,富在深山有远亲。

谁人背后无人说,哪个人前不说人?

有钱道真语,无钱语不真。

不信但看筵中酒,杯杯先劝有钱人。

闹里挣钱,静处安身。

来如风雨,去似微尘。

长江后浪推前浪,世上新人赶旧人。

近水楼台先得月,向阳花木早逢春。

古人不见今时月,今月曾经照古人。

先到为君,后到为臣。

莫道君行早,更有早行人。

莫信直中直,须防仁不仁。

山中有直树,世上无直人。

自恨枝无叶,莫怨太阳偏。

- 一切都是命,半点不由人。
- 一年之计在于春,一日之计在于寅。
- 一家之计在于和,一生之计在于勤。

责人之心责己,恕己之心恕人。

守口如瓶,防意如城。

宁可人负我,切莫我负人。

再三须慎意,第一莫欺心。

虎身犹可近,人毒不可亲。

来说是非者,便是是非人。

远水难救近火,远亲不如近邻。

有酒有肉多兄弟,急难何曾见一人?

人情似纸张张薄,世事如棋局局新。

山中也有千年树,世上难逢百岁人。

力微休负重,言轻莫劝人。

无钱休入众,遭难莫寻亲。

平生不做皱眉事,世上应无切齿人。

士者国之宝,儒为席上珍。

若要断酒法,醒眼看醉人。

求人须求大丈夫,济人须济急时无。

渴时一滴如甘露,醉后添杯不如无。

久住令人贱,频来亲也疏。

酒中不语真君子,财上分明大丈夫。

出家如初,成佛有余。

积金千两,不如明解经书。

养子不教如养驴,养女不教如养猪。

有田不耕仓廪虚,有书不读子孙愚。

仓廪虚兮岁月乏,子孙愚兮礼仪疏。

听君一席话,胜读十年书。

人不通今古,马牛如襟裾。

茫茫四海人无数,哪个男儿是丈夫?

白酒酿成缘好客,黄金散尽为收书。

救人一命,胜造七级浮屠。

城门失火,殃及池鱼。

庭前生瑞草,好事不如无。

欲求生富贵,须下死工夫。

百年成之不足,一旦坏之有余。

人心似铁,官法如炉。

善化不足,恶化有余。

水至清则无鱼,人太急则无智。

知者减半,愚者全无。

在家由父,出嫁从夫。

痴人畏妇, 贤女敬夫。

是非终日有,不听自然无。

竹篱茅舍风光好,道院僧房终不如。

宁可正而不足,不可邪而有余。

宁可信其有,不可信其无。

命里有时终须有,命里无时莫强求。

道院迎仙客,书堂隐相儒。

庭栽栖凤竹,池养化龙鱼。

结交须胜己,似我不如无。

但看三五日,相见不如初。

人情似水分高下,世事如云任卷舒。

会说说都是,不会说无理。

磨刀恨不利,刀利伤人指;

求财恨不多,财多害自己。

知足常足,终身不辱;

知止常止,终身不耻。

有福伤财,无福伤己。

差之毫厘,失之千里。

若登高必自卑,若涉远必自迩。

三思而行,再思可矣。

动口不如亲为,求人不如求己。

小时是兄弟,长大各乡里。

嫉财莫嫉食,怨生莫怨死。

人见白头嗔,我见白头喜。

多少少年郎,不到白头死。

墙有缝,壁有耳。

好事不出门,坏事传千里。

若要人不知,除非己莫为。

为人不做亏心事,半夜敲门心不惊。

贼是小人,智过君子。

君子固穷,小人穷斯滥矣。

富贵多忧,贫穷自在。

不以我为德,反以我为仇。

宁可直中取,不可曲中求。

人无远虑,必有近忧。

知我者谓我心忧,不知我者谓我何求?

晴天不肯去,直待雨淋头。

成事莫说,覆水难收。

是非只为多开口,烦恼皆因强出头。

忍得一时之气,免得百日之忧。

近来学得乌龟法,得缩头时且缩头。

惧法朝朝乐,欺公日日忧。

人生一世,草长一春。

黑发不知勤学早,转眼便是白头翁。

月过十五光明少,人到中年万事休。

儿孙自有儿孙福,莫为儿孙做马牛。

人生不满百,常怀千岁忧。

今朝有酒今朝醉,明日愁来明日忧。

路逢险处须回避,事到临头不自由。

人贫不语,水平不流。

一家养女百家求,一马不行百马忧。

有花方酌酒,无月不登楼。

三杯通大道,一醉解千愁。

深山毕竟藏猛虎,大海终须纳细流。

惜花须检点,爱月不梳头。

大抵选她肌骨好,不搽红粉也风流。

受恩深处宜先退,得意浓时便可休。

莫待是非来入耳,从前恩爱反为仇。

留得五湖明月在,不愁无处下金钩。

休别有鱼处,莫恋浅滩头。

去时终须去,再三留不住。

忍一句,息一怒,饶一着,退一步。

三十不豪,四十不富,五十将来寻死路。

生不认魂,死不认尸。

一寸光阴一寸金,寸金难买寸光阴。

父母恩深终有别,夫妻义重也分离。

人生似鸟同林宿,大难来时各自飞。

人善被人欺, 马善被人骑。

人无横财不富,马无夜草不肥。

人恶人怕天不怕,人善人欺天不欺。

善恶到头终有报,只盼来早与来迟。

黄河尚有澄清日,岂能人无得运时?

得宠思辱,居安思危。

念念有如临敌日,心心常似过桥时。

英雄行险道,富贵似花枝。

人情莫道春光好,只怕秋来有冷时。

送君千里,终有一别。

但将冷眼观螃蟹,看你横行到几时。

见事莫说,问事不知。

闲事莫管,无事早归。

假缎染就真红色,也被旁人说是非。

善事可做,恶事莫为。

许人一物,千金不移。

龙生龙子,虎生虎儿。

龙游浅水遭虾戏,虎落平原被犬欺。

一举首登龙虎榜,十年身到凤凰池。

十年寒窗无人问,一举成名天下知。

酒债寻常处处有,人生七十古来稀!

养儿防老,积谷防饥。

鸡豚狗彘之畜, 无失其时, 数口之家, 可以无饥矣。

当家才知盐米贵,养子方知父母恩。

常将有日思无日,莫把无时当有时。

树欲静而风不止,子欲养而亲不待。

时来风送滕王阁,运去雷轰荐福碑。

入门休问荣枯事,且看容颜便得知。

官清司吏瘦,神灵庙祝肥。

息却雷霆之怒, 罢却虎豹之威。

饶人算之本,输人算之机。

好言难得,恶语易施。

一言既出,驷马难追。

道吾好者是吾贼,道吾恶者是吾师。

路逢侠客须呈剑,不是才人莫献诗。

三人行必有我师焉。

择其善者而从之,其不善者而改之。

欲昌和顺须为善,要振家声在读书。

少壮不努力,老大徒伤悲。

人有善愿,天必佑之。

莫饮卯时酒,昏昏醉到酉。

莫骂酉时妻,一夜受孤凄。

种麻得麻,种豆得豆。

天眼恢恢,疏而不漏。

见官莫向前,作客莫在后。

宁添一斗,莫添一口。

螳螂捕蝉,岂知黄雀在后?

不求金玉重重贵,但愿儿孙个个贤。

一日夫妻,百世姻缘。

百世修来同船渡,千世修来共枕眠。

杀人一万,自损三千。

伤人一语,利如刀割。

枯木逢春犹再发,人无两度再少年。

未晚先投宿,鸡鸣早看天。

将相顶头堪走马,公侯肚内好撑船。

富人思来年,穷人想眼前。

世上若要人情好,赊去物品莫取钱。

生死有命,富贵在天。

击石原有火,不击乃无烟。

人学始知道,不学亦徒然。

莫笑他人老,终须还到老。

和得邻里好,犹如拾片宝。

但能守本分,终身无烦恼。

大家做事寻常,小家做事慌张。

大家礼义教子弟,小家凶恶训儿郎。

君子爱财,取之有道。

贞妇爱色,纳之以礼。

善有善报,恶有恶报。

不是不报,时候未到。

万恶淫为首,百行孝当先。

人而无信,不知其可也。

一人道虚,千人传实。

凡事要好,须问三老。

若争小利,便失大道。

家中不和邻里欺,邻里不和说是非。

年年防饥, 夜夜防盗。

学者是好,不学不好。

学者如禾如稻,不学如草如蒿。

遇饮酒时须防醉,得高歌处且高歌。

因风吹火,用力不多。

不因渔夫引,怎能见波涛?

无求到处人情好,不饮任他酒价高。

知事少时烦恼少,识人多处是非多。

进山不怕伤人虎,只怕人情两面刀。

强中更有强中手,恶人须用恶人磨。

会使不在家富豪,风流不用衣着佳。

光阴似箭,日月如梭。

天时不如地利,地利不如人和。

黄金未为贵,安乐值钱多。

为善最乐,作恶难逃。

羊有跪乳之恩,鸦有反哺之情。

孝顺还生孝顺子,忤逆还生忤逆儿。

不信但看檐前水,点点滴滴旧窝池。

隐恶扬善,执其两端。

妻贤夫祸少,子孝父心宽。

已覆之水,收之实难。

人生知足时常足,人老偷闲且是闲。

处处绿杨堪系马,家家有路通长安。

既坠釜甑,反顾何益。

见者易,学者难。

厌静还思喧,嫌喧又忆山。

自从心定后,无处不安然。

莫将容易得,便作等闲看。

用心计较般般错,退后思量事事宽。

道路各别,养家一般。

由俭入奢易,从奢入俭难。

知音说与知音听,不是知音莫与谈。

点石化为金,人心犹未足。

信了赌,卖了屋。

他人观花,不涉你目。

他人碌碌,不涉你足。

谁人不爱子孙贤,谁人不爱千钟粟。

奈五行,不是这般题目。

莫把真心空计较, 儿孙自有儿孙福。

书到用时方恨少,事非经过不知难。

天下无不是的父母,世上最难得者兄弟。

与人不和,劝人养鹅;与人不睦,劝人架屋。

但行好事,莫问前程。不交僧道,便是好人。

河狭水激,人急计生。

明知山有虎,莫向虎山行。

路不铲不平,事不为不成。

无钱方断酒,临老始读经。

点塔七层,不如暗处一灯。

堂上二老是活佛,何用灵山朝世尊。

万事劝人休瞒昧,举头三尺有神明。

但存方寸土,留与子孙耕。

灭却心头火,剔起佛前灯。

惺惺多不足,蒙蒙作公卿。

众星朗朗,不如孤月独明。

兄弟相害,不如友生。

合理可作,小利不争。

牡丹花好空入目,枣花虽小结实多。

欺老莫欺小,欺人心不明。

勤奋耕锄收地利,他时饱暖谢苍天。

得忍且忍,得耐且耐,不忍不耐,小事成灾。

相论逞英豪,家计渐渐退。

贤妇令夫贵,恶妇令夫败。

一人有庆, 兆民咸赖。

人老心未老,人穷志莫穷。

人无千日好,花无百日红。

黄蜂一口针,橘子两边分。

世间痛恨事,最毒淫妇心。

杀人可恕,情理不容。

乍富不知新受用, 乍贫难改旧家风。

座上客常满,杯中酒不空。

屋漏更遭连夜雨,行船又遇打头风。

笋因落箨方成竹,鱼为奔波始化龙。

记得少年骑竹马,转眼又是白头翁。

礼义生于富足,盗贼出于赌博。

天上众星皆拱北,世间无水不朝东。

士为知己者死,女为悦己者容。

色即是空,空即是色。

君子安贫,达人知命。

良药苦口利于病,忠言逆耳利于行。

顺天者昌,逆天者亡。

有缘千里来相会,无缘对面不相逢。

有福者昌,无福者亡。

人为财死, 鸟为食亡。

夫妻相和好,琴瑟与笙簧。

红粉易妆娇态女,无钱难作好儿郎。

有子之人贫不久,无儿无女富不长。

善必寿老,恶必早亡。

爽口食多偏作病,快心事过恐遭殃。

富贵定要依本分,贫穷不必再思量。

画水无风空作浪,绣花虽好不闻香。

贪他一斗米,失却半年粮。

争他一脚豚,反失一肘羊。

龙归晚洞云犹湿,麝过春山草木香。

平生只会说人短,何不回头把己量?

见善如不及,见恶如探汤。

人穷志短,马瘦毛长。

自家心里急,他人未知忙。

贫无达士将金赠,病有高人说药方。

触来莫与竞,事过心清凉。

秋来满山多秀色,春来无处不花香。

凡人不可貌相,海水不可斗量。

清清之水为土所防,济济之士为酒所伤。

蒿草之下或有兰香,茅茨之屋或有侯王。

无限朱门生饿殍,几多白屋出公卿。

酒里乾坤大,壶中日月长。

拂石坐来春衫冷,踏花归去马蹄香。

万事前身定,浮生空自忙。

叫月子规喉舌冷,宿花蝴蝶梦魂香。

- 一言不中,千言不用。
- 一人传虚,百人传实。

万金良药,不如无疾。

千里送鹅毛,礼轻情义重。

世事如明镜,前程暗似漆。

君子怀刑,小人怀惠。

架上碗儿轮流转,媳妇自有做婆时。

人生一世,如驹过隙。

良田万顷,日食一升。

大厦千间, 夜眠八尺。

千经万典,孝义为先。

天上人间,方便第一。

一字入公门,九牛拔不出。

八字衙门向南开,有理无钱莫进来。

欲求天下事,须用世间财。

富从升合起,贫因不算来。

近河不得枉使水,近山不得枉烧柴。

家无读书子,官从何处来?

慈不掌兵, 义不掌财。

一夫当关,万夫莫开。

万事不由人计较,一生都是命安排。

白云本是无心物,却被清风引出来。

慢行急行,逆取顺取。

命中只有如许财,丝毫不可有闪失。

人间私语,天闻若雷。

暗室亏心,神目如电。

一毫之恶, 劝人莫作。一毫之善, 与人方便。

亏人是祸,饶人是福,天眼恢恢,报应甚速。

圣贤言语,神钦鬼服。

人各有心,心各有见。

口说不如身逢,耳闻不如目见。

见人富贵生欢喜,莫把心头似火烧。

养兵千日,用在一时。

国清才子贵,家富小儿娇。

利刀割体疮犹使,恶语伤人恨不消。

公道世间唯白发,贵人头上不曾饶。

有才堪出众,无衣懒出门。

为官须作相,及第必争先。

苗从地发,树由枝分。

宅里燃火,烟气成云。

以直报怨,知恩报恩。

红颜今日虽欺我,白发他时不放君。

借问酒家何处有,牧童遥指杏花村。

父子和而家不退,兄弟和而家不分。

一片云间不相识,三千里外却逢君。

官有公法,民有私约。

平时不烧香,临时抱佛脚。

幸生太平无事日,恐防年老不多时。

国乱思良将,家贫思良妻。

池塘积水须防旱,田地深耕足养家。

根深不怕风摇动,树正何愁月影斜。

争得猫儿,失却牛脚。

愚者千虑,必有一得,智者千虑,必有一失。

始吾于人也,听其言而信其行。

今吾于人也,听其言而观其行。

哪个梳头无乱发,情人眼里出西施。

珠沉渊而川媚,玉韫石而山辉。

夕阳无限好,只恐不多时。

久旱逢甘霖,他乡遇故知;洞房花烛夜,金榜题名时。

惜花春起早,爱月夜眠迟。

掬水月在手,弄花香满衣。

桃红李白蔷薇紫,问着东君总不知。

教子教孙须教义,栽桑栽柘少栽花。

休念故乡生处好,受恩深处便为家。

学在一人之下,用在万人之上。

一日为师,终生为父。

忘恩负义, 禽兽之徒。

劝君莫将油炒菜,留与儿孙夜读书。

书中自有千钟粟,书中自有颜如玉。

莫怨天来莫怨人,五行八字命生成。

莫怨自己穷,穷要穷得干净;莫羡他人富,富要富得清高。

别人骑马我骑驴,仔细思量我不如,

待我回头看,还有挑脚汉。

路上有饥人,家中有剩饭。

积德与儿孙,要广行方便。

作善鬼神钦,作恶遭天遣。

积钱积谷不如积德,买田买地不如买书。

一日春工十日粮,十日春工半年粮。

疏懒人没吃,勤俭粮满仓。

人亲财不亲,财利要分清。

十分伶俐使七分,常留三分与儿孙,

若要十分都使尽,远在儿孙近在身。

君子乐得做君子,小人枉自做小人。

好学者则庶民之子为公卿,不好学者则公卿之子为庶民。

惜钱莫教子,护短莫从师。

记得旧文章,便是新举子。

人在家中坐,祸从天上落。

但求心无愧,不怕有后灾。

只有和气去迎人,哪有相打得太平。

忠厚自有忠厚报,豪强一定受官刑。

人到公门正好修,留些阴德在后头。

为人何必争高下,一旦无命万事休。

山高不算高,人心比天高。

白水变酒卖,还嫌猪无糟。

贫寒休要怨,宝贵不须骄。

善恶随人作,祸福自己招。

奉劝君子,各宜守己。

只此呈示,万无一失。

# 下集

前人俗语,言浅理深。

补遗增广,集成书文。

世上无难事,只怕不专心。

成人不自在,自在不成人;

金凭火炼方知色,与人交财便知心。

乞丐无粮,懒惰而成。

勤俭为无价之宝,节粮乃众妙之门。

省事俭用,免得求人。

量大祸不在,机深祸亦深。

善为至宝深深用,心作良田世世耕。

群居防口,独坐防心。

体无病为富贵,身平安莫怨贫。

败家子弟挥金如土,贫家子弟积土成金。

富贵非关天地,祸福不是鬼神。

安分贫一时,本分终不贫。

不拜父母拜干亲,弟兄不和结外人。

人过留名,雁过留声。

择子莫择父,择亲莫择邻。

爱妻之心是主,爱子之心是亲。

事从根起,藕叶连心。

祸与福同门, 利与害同城。

清酒红人脸,财帛动人心!

宁可荤口念佛,不可素口骂人。

有钱能说话,无钱话不灵。

岂能尽如人意?但求不愧吾心。

不说自己井绳短,反说他人箍井深。

恩爱多生病,无钱便觉贫。

只学斟酒意,莫学下棋心。

孝莫假意,转眼便为人父母。

善休望报,回头只看汝儿孙!

口开神气散,舌出是非生!

弹琴费指甲,说话费精神。

千贯买田,万贯结邻。

人言未必犹尽,听话只听三分。

隔壁岂无耳,窗外岂无人?

财可养生须注意,事不关己不劳心。

酒不护贤,色不护病;

财不护亲,气不护命!

一日不可无常业,安闲便易起邪心!

炎凉世态,富贵更甚于贫贱;

嫉妒人心,骨肉更甚于外人!

瓜熟蒂落,水到渠成。

人情送匹马,买卖不饶针!

过头饭好吃,过头话难听!

事多累了自己,田多养了众人。

怕事忍事不生事自然无事;

平心静心不欺心何等放心!

天子至尊不过于理,在理良心天下通行。

好话不在多说,有理不在高声!

一朝权在手,便把令来行。

甘草味甜人可食,巧言妄语不可听。

当场不论,过后枉然。

贫莫与富斗,富莫与官争!

官清难逃猾吏手,衙门少有念佛人!

家有千口,主事一人。

父子竭力山成玉,弟兄同心土变金。

当事者迷,旁观者清。

怪人不知理,知理不怪人。

未富先富终不富,未贫先贫终不贫。

少当少取,少输当赢!

饱暖思淫欲,饥寒起盗心!

蚊虫遭扇打,只因嘴伤人!

欲多伤神,财多累心!

布衣得暖真为福,千金平安即是春。

家贫出孝子,国乱显忠臣!

宁做太平犬,莫做离乱人!

人有几等,官有几品。

理不卫亲,法不为民。

自重者然后人重,人轻者便是自轻。

自身不谨,扰乱四邻。

快意事过非快意,自古败名因败事。

伤身事莫做,伤心话莫说。

小人肥口,君子肥身。

地不生无名之辈,天不生无路之人。

一苗露水一苗草,一朝天子一朝臣。

读未见书,如得良友;见已读书,如逢故人。

福满须防有祸, 凶多料必无争。

不怕三十而死,只怕死后无名。

但知江湖者,都是薄命人。

不怕方中打死人,只知方中无好人。

说长说短,宁说人长莫说短;

施恩施怨,宁施人恩莫施怨。

育林养虎,虎大伤人。

冤家抱头死,事要解交人。

卷帘归乳燕,开扇出苍蝇。

爱鼠常留饭, 怜蛾灯罩纱。

人命在天,物命在人。

奸不通父母,贼不通地邻。

盗贼多出赌博,人命常出奸情。

治国信谗必杀忠臣,治家信谗必疏其亲。

治国不用佞臣,治家不用佞妇。

好臣一国之宝,好妇一家之珍。

稳的不滚,滚的不稳。

儿不嫌母丑,狗不嫌家贫。

君子千钱不计较,小人一钱恼人心。

人前显贵,闹里夺争。

要知江湖深,一个不做声。

知止自当出妄想,安贫须是禁奢心。

初入行业,三年事成;

初吃馒头,三年口生。

家无生活计,坐吃如山崩。

家有良田万顷,不如薄艺在身;

艺多不养家,食多嚼不赢。

命中只有八合米,走遍天下不满升。

使心用心,反害自身。

国家无空地,世上无闲人。

妙药难医怨逆病,混财不富穷命人。

耽误一年春,十年补不清;

人能处处能,草能处处生。

会打三班鼓, 也要几个人。

人不走不亲,水不打不浑。

三贫三富不到老,十年兴败多少人!

买货买得真,折本折得轻;

不怕问到,只怕倒问。

人强不如货强,价高不如口便。

会买买怕人,会卖卖怕人。

只只船上有梢公,天子足下有贫亲。

既知莫望,不知莫向。

在一行,练一行;

穷莫失志,富莫癫狂。

天欲令其灭亡,必先让其疯狂。

梢长人胆大,梢短人心慌。

隔行莫贪利, 久炼必成钢。

瓶花虽好艳,相看不耐长。

早起三光,迟起三慌。

未来休指望,过去莫思量;

时来遇好友,病去遇良方。

布得春风有夏雨,哈得秋风大家凉。

晴带雨伞,饱带饥粮。

满壶全不响,半壶响叮当。

久利之事莫为,众争之地莫往。

老医迷旧疾,朽药误良方;

该在水中死,不在岸上亡。

舍财不如少取,施药不如传方。

倒了城墙丑了县官,打了梅香丑了姑娘。

燕子不进愁门,耗子不钻空仓。

苍蝇不叮无缝蛋,谣言不找谨慎人。

一人舍死,万人难当。

人争一口气,佛争一炷香。

门为小人而设,锁乃君子之防。

舌咬只为揉,齿落皆因眶。

硬弩弦先断,钢刀刃自伤。

贼名难受,龟名难当。

好事他人未见讲,错处他偏说得长。

男子无志纯铁无钢,女子无志烂草无瓤。

生男欲得成龙犹恐成獐,生女欲得成凤犹恐成虎。

养男莫听狂言,养女莫叫离母。

男子失教必愚顽,女子失教定粗鲁。

生男莫教弓与弩,生女莫教歌与舞。

学成弓弩沙场灾,学成歌舞为人妾。

财交者密,财尽者疏。

婚姻论财,夫妻之道。

色娇者亲,色衰者疏。

少实胜虚,巧不如拙。

百战百胜不如无争,万言万中不如一默。

有钱不置怨逆产,冤家宜解不宜结。

近朱者赤,近墨者黑。

一个山头一只虎,恶龙难斗地头蛇。

出门看天色,进门看脸色。

商贾买卖如施舍,买卖公平如积德。

天生一人, 地生一穴。

家无三年之积不成其家,国无九年之积不成其国。

男子有德便是才,女子无才便是德。

有钱难买子孙贤,女儿不请上门客。

男大当婚女大当嫁,不婚不嫁惹出笑话。

谦虚美德,过谦即诈。

自己跌倒自己爬,望人扶持都是假。

人不知己过, 牛不知力大。

一家饱暖千家怨,一物不见赖千家。

当面论人惹恨最大,是与不是随他说吧!

谁人做得千年主,转眼流传八百家。

满载芝麻都漏了,还在水里捞油花!

皇帝坐北京,以理统天下。

五百年前共一家,不同祖宗也同华!

学堂大如官厅,人情大过王法。

找钱犹如针挑土,用钱犹如水推沙!

害人之心不可有,防人之心不可无!

不愁无路,就怕不做。

须向根头寻活计,莫从体面下功夫!

祸从口出,病从口入。

药补不如肉补,肉补不如养补。

思虑之害甚于酒色,日日劳力上床呼疾。

人怕不是福,人欺不是辱。

能言不是真君子, 善处方为大丈夫!

为人莫犯法,犯法身无主。

姊妹同肝胆, 弟兄同骨肉。

慈母多误子,悍妇必欺夫!

君子千里同舟,小人隔墙易宿。

文钱逼死英雄汉,财不归身恰是无。

妻子如衣服,弟兄似手足。

衣服补易新,手足断难续。

盗贼怨失主,不孝怨父母。

一时劝人以口,百世劝人以书。

我不如人我无其福,人不如我我常知足!

捡金不忘失金人,三两黄铜四两福。

因祸得福,求赌必输。

一言而让他人之祸,一忿而折平生之福。

天有不测风云,人有旦夕祸福。

不淫当斋,淡饱当肉。

缓步当车,无祸当福。

男无良友不知己之有过,女无明镜不知面之精粗。

事非亲做,不知难处。

十年易读举子,百年难淘江湖!

积钱不如积德,闲坐不如看书。

思量挑担苦,空手做是福。

时来易借银千两,运去难赊酒半壶。

天晴打过落雨铺,少时享过老来福。

与人方便自己方便,一家打墙两家好看。

当面留一线,过后好相见。

入门掠虎易,开口告人难。

手指要往内撇,家丑不可外传。

浪子出于祖无德,孝子出于前人贤。

货离乡贵,人离乡贱。

树挪死,人挪活。

在家千日好,出门处处难。

三员长者当官员,几个明人当知县?

明人自断,愚人官断。

人怕三见面,树怕一墨线。

村夫硬似铁,光棍软如棉。

不是撑船手,怎敢拿篙竿!

天下礼仪无穷,一人知识有限。

一人不得二人计,宋江难结万人缘。

家有三亩田,不离衙门前,乡间无强汉,衙门就饿饭。

人人依礼仪,天下不设官。

衙门钱,眼睛钱;

田禾钱,千万年。

诗书必读,不可做官。

为人莫当官,当官皆一般。

换了你我去,恐比他还贪。

官吏清廉如修行,书差方便如行善。

靠山吃山,种田吃田。

吃尽美味还是盐,穿尽绫罗还是棉。

一夫不耕,全家饿饭,一女不织,全家受寒。

金银到手非容易,用时方知来时难。

先讲断,后不乱,免得藕断丝不断。

听人劝,得一半。

不怕慢,只怕站。

逢快莫赶,逢贱莫懒。

谋事在人,成事在天!

长路人挑担,短路人赚钱。

宁卖现二,莫卖赊三。

赚钱往前算,折本往后算。

小小生意赚大钱,七十二行出状元。

自己无运至,却怨世界难。

胆大不如胆小,心宽甚如屋宽。

妻贤何愁家不富,子孙何须受祖田。

是儿不死,是财不散。

财来生我易,我去生财难。

十月滩头坐,一日下九滩。

结交一人难上难,得罪一人一时间。

借债经商,卖田还债;

赊钱起屋,卖屋还钱。

修起庙来鬼都老,拾得秤来姜卖完。

不嫖莫转,不赌莫看。

节食以去病,少食以延年。

豆腐多了是包水,梢公多了打烂船。

无口过是,无眼过难。

无身过易,无心过难。

不会凫水怨河湾,不会犁田怨枷担。

他马莫骑,他弓莫挽。

要知心腹事,但听口中言。

宁在人前全不会,莫在人前会不全。

事非亲见,切莫乱谈。

打人莫打脸,骂人莫骂短。

好言一句三冬暖,话不投机六月寒。

人上十口难盘,帐上万元难还。

放债如施, 收债如讨。

告状讨钱,海底摸盐。

衙门深似海,弊病大如天。

银钱莫欺骗,牛马不好变。

好汉莫被人识破,看破不值半文钱。

狗咬对头人,雷打三世冤。

不卖香烧无剩钱,井水不打不满边。

事宽则园,太久则偏。

高人求低易,低人求高难。

有钱就是男子汉,无钱就是汉子难。

人上一百,手艺齐全。

难者不会,会者不难。

生就木头造就船,砍的没得车的圆。

心不得满,事不得全。

鸟飞不尽,话说不完。

人无喜色休开店,事不遂心莫怨天。

选婿莫选田园,选女莫选嫁奁。

红颜女子多薄命,福人出在丑人边。

人将礼义为先,树将花果为园。

临危许行善,过后心又变。

天意违可以人回,命早定可以心挽。

强盗口内出赦书,君子口中无戏言。

贵人语少,贫子话多。

快里须斟酌,耽误莫迟春。

读过古华佗,不如见症多。

东屋未补西屋破,前帐未还后又拖。

今年又说明年富,待到明年差不多。

志不同己,不必强合。

莫道坐中安乐少,须知世上苦情多。

本少利微强如坐,屋檐水也滴得多。

勤俭持家富,谦恭受益多。

细处不断粗处断,黄梅不落青梅落。

见钱起意便是贼,顺手牵羊乃为盗。

要做快活人,切莫寻烦恼。

要做长寿人,莫做短命事。

要做有后人,莫做无后事。

不经一事,不长一智。

宁可无钱使,不可无行止。

栽树要栽松柏,结交要结君子。

秀才不出门,能知天下事。

钱多不经用,儿多不耐死。

弟兄争财家不穷不止,妻妾争风夫不死不止。

男人有志,妇人有势。

夫人死百将临门,将军死一卒不至。

天旱误甲子,人穷误口齿。

百岁无多日,光阴能几时?

父母养其身,自己立其志。

待有余而济人,终无济人之日;

待有闲而读书,终无读书之时。

此书传后世,句句必精读,其中礼和义,奉劝告世人。

勤奋读,苦发奋,走遍天涯如游刃。